

**Aningaasalersuisarnermik ingerlataqarneq pillugu peqqussutip Kalaallit Nunaanni
atuutilernejarneranut Namminersorlutik Oqartussat akuersinissaat pillugu Inatsisartut
aalajangiiffigisassaattut siunnersuut**

Aningaasaqarnermut Naligiissitaanermullu Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneernejarneranut

ISUMALIUTISSIISSUTAA

Ataatsimiititaliap suliarinninnermini ilaasortarai :

Inatsisartunut ilaasortaq Hans-Peter Poulsen, Siumut, siulittaasoq
Inatsisartunut ilaasortaq Jens-Frederik Nielsen, Demokraatit, siulittaasup tullia
Inatsisartunut ilaasortaq Hans Aronsen, Inuit Ataqtigiit
Inatsisartunut ilaasortaq Agathe Fontain, Inuit Ataqtigiit
Inatsisartunut ilaasortaq Kuno Fencker, Siumut
Inatsisartunut ilaasortaq Lars Poulsen, Siumut
Inatsisartunut ilaasortaq Jens Napaattoq, Naleraq

UPA 2022-mi ulloq 3. maj 2022 siullermeerinninnerup kingorna ataatsimiititaliap sunnersuut misissorpaa.

Siunnersuutip imarisaa siunertaalu

Peqqussutissatut missingiutikkut matumuunakkut siunertarineqarpoq aningaasalersuisarnermik ingerlataqarneq pillugu inatsisip, Kunngip peqqussutaatigut Kalaallit Nunaannut atuuttuuler-sinneqareersup, nutarternejarnissaa. Aalajangiiffigisassatut siunnersuutikkut matumuunakkut aningaasalersuisarnermik ingerlataqarneq pillugu Kalaallit Nunaanni inatsit Danmarkimi inatsimmi allannguutaasimasunut naapertuuttunngortillugu nutarternejassaaq.

Siunnersuutip ilaatigut imarai ingerlatseqatigiiffinnik kikkut piginnittorpiaanerat pillugu paa-sissutissanik aningaasaqarnermik ingerlatsisut qulakkeerinnittussaataitanerannut maleruagas-sat. Inatsisartut 2021-mi ukiakkut ataatsimiinnermi siunnersuutinik arlalinnik, ilaatigut inger-latseqatigiiffiit pillugit inatsimmi aammalu aningaasatigut peqquserluutinik malunnarunnaar-

saaneq pillugu inatsimmi piginnittorpiaat nalunaarsorneqarnissaannik maleruagassanik taamaattunik imaqartunik, akuersissutiginnereerput. Taamaalillunilu siunnersuut una piginnittorpiaat pillugit siunnersuutit ataatsimoortut ilagaat.

Siunnersuutip Inatsisartunit siullermeerneqarnera

Siunnersuut taama iluseqartoq partiinit tamakkiisumik taparserneqarpoq aammalu Aningaasaqarnermut Akileraartarnermullu Ataatsimiititaliamit suliarineqartussanngorlugu innersuuneqarluni. Taamaattorli inatsisinik matumani pineqartutut ittunik nutarterinerit pilertornerusumik pisarnissaat kissaatiginartinneqartoq oqaatigineqarpoq.

Tusarniaanermut akissutit

Siunnersuut kikkunnut tusarniaassutigineqarsimanersoq tusarniaaneq pillugu allakkiami takuneqarsinnaavoq. Tusarniaaneq oqaaseqaateqarnissamut tunngavissiisimangitsoq paasisutissiissutigineqarpoq.

Ataatsimiititaliap siunnersuummik suliarinninnera

Paasisutissanik annertunerusunik ujartuinissaq apeqqutinilluunniit nalornissutaasunik qulaajaanissaq ataatsimiititaliamit pissutissaqartinneqarsimangilaq. Tunngavilersuutit Naalakkersuisunit saqqummiunneqartut kiisalu siunnersuuteqarnermut tunuliaqutaasut ataatsimiititaliamit tusaatissatut tiguneqarput. Tassunga atatillugu Naalakkersuisut peqqussummut kiisalu siunnersuummi allannguutinut iluarsiiisutinullu ataasiakkaanut nassuiaatitut eqikkakkamut innersuussinerat ataatsimiititaliamit tusaatissatut tiguneqarpoq.

Siunnersuutip aningaasaqarnikkut kingunerisassai


Siunnersuutip pisortanut aningaasatigut taasarialinnik kinguneqarnissaa naatsorsuutigineqanngilaq.

Taamatutaaq siunnersuutip innuttaasunut aningaasaqarnikkut allaffissornikkullu kinguneqarnissaa naatsorsuutigineqanngilaq.


Ataatsimiititaliap inassuteqaatai:

Siunnersuut akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa .



Hans Peter Poulsen
Siulittaasoq




Jens-Frederik Nielsen
Siulittaasup tullia




Hans Aronsen




Agathe Fontain



Kuno Fencker



Lars Poulsen



Jens Napaattooq